

■ COLUMNA

Mes di da gloria

DAD ERWIN ARDÜSER*

Dumengia, ils 4 d'october 1981. In di d'atun da bellezza. Jau ma regord anc precis. Che quella dumengia vegnia dentant ad ir en la annalas na sminava nagin. Gnanc jau. Ma da quai pli tard.

Sco «di da gloria» vegnan per il solit titulads eveniments e muments ch'han muventà, forsa schizunt midà il mund: L'invenziun da la roda, la scuverta da l'America, il sgol sin la gli-na per mo numnar trais pitschens exempels. Almain in di da gloria ha speranza mintgina e mintgin da nus pudì giudair en sia vita. In da quels muments ch'ils reflecturs èn drizzads suletamain sin nus, che nus pudesan embratschar l'entir mund dal plaschair e da la legria.

Prendai in mumentin peda e sfegliai en la memoria. Segir as regurdais era vus da quels muments da gloria che stgandan anc adina il cor.

Avant 40 onns, l'onn 1980, è vegnì fundà il CBL, il Club da ballapei Laax. Quai eran ils onns d'in veritabel boom da ballape en Surselva. En consequenza devi quasi mintga fin d'emna derbys. E quai



eran veritablas festas popularas. La rivalitad tranter ils clubs era gronda, ed er ils gieus da las ligas bassas attiravan adina ina fulla da glieud.

Betg auter è quai stà quella dumengia dals 4 d'october 1981. Avant porta steva in giuè tut spezial, l'emprim derby insumma tranter las equipas da la 5. liga da Schluein e Laax. Ils autos eran parcads dretg e sanester da la via che maina a la piazza da ballape a Schluein. Giuven e vegl, umens e dunnas, babs e mammas na vulevan per tut pretsch betg manchen-tar quest mument istoric. Tschients persunas eran sa spustadas a l'ur da la piazza da ballape e spetgavan plain tensiun sin ils gladiaturs en chautscha curta.

Dus dis pli tard spetg jau cun brama sin la «Gasetta Romontscha». En detagl publitgava quella

mintgamai ils rapports dals gieus da ballape ch'emple-nivan entiras paginas e che tutgavan tar la lectura preferida era da nus giuven. Ed en la GR han ins pudì leger quel di nair sin alv: Ei dat in giug plascheivel cun bialas acziuns dad omisdu-as varts. Ella 20avla minuta metscha Erwin Ardüser cul bal viers Hugo Holderegger ed ha neginas difficultads da marcar il 0:1 – segir ina sorpresa per Schluein da-mai ch'il giug sespleiga durent quei temps plitost avon il gol da Laax...

Pli tard hai dà anc auters eveniments spezials, muments magics en mia vita. Ma quel, quel da l'emprim gol en l'emprim derby tranter Schluein e Laax, quel mument cura ch'il bal aveva traversà la lingia dal gol, quel mument dal giubel collectiv da noss'equipa e dals fans a l'ur da la piazza, quel ha in plaz spezial en mia memoria.

Dal rest: Suenter 90 minutas è il giuè tranter Schluein e Laax i a fin cun il resultat da 2:2. Il segund gol per Laax aveva Fridolin Caviezel fatg, ils gols per Schluein Christof Cavelti e Renaldo Pelican.

* Erwin Ardüser abitescha a Laax e lavura en l'administraziun da Radiotelevision Svizra Rumantscha.